

**Uunga siunnersuut: Aningaasaatigisanit iluanaarutit akileraarusersorneqarnerat pillugu
Inatsisartut inatsisaat nr. xx, xx. xxx 2017-imeersoq aamma
Soraarnerussutisiaqalernissamut aningaasaatit ilaannit pissarsiat
akileraaruserneqartarnerat pillugu Inatsisartut inatsisaat nr. xx, xx. xxx 2017-imeersoq
(Aningaasaqarnermut Akileraartarnermullu Naalakkersuisoq)**

Saqqummiussissut

Siullermeerneqarnera

Naalakkersuisut sinnerlugit matumuuna saqqummiutissavakka aningaasaatigisanit iluanaarutit akileraarusersorneqartarnerat pillugu Inatsisartut inatsisissaattut siunnersuut kiisalu soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisissaattut siunnersuut.

Inatsisissatut siunnersuutit saqqummiunneqartut tamarmik soraarnerussutisiaqalernissamut ileqqaakkanit pissarsiat akileraarusersorneqartarnerannut tunngapput ataqtigilliunnarlutillu. Taamaattumik Naalakkersuisunit qinnutigisimavarput, inatsisissatut siunnersuutit ataatsikkut Inatsisartunut saqqummiunneqassasut.

Aningaasaatinit iluanaarutit akileraarusersorneqarnerat pillugu siunnersuummi pingarnertut siunniunneqarput soraarnerussutisiaqarnissaq siunertalarugu, Kalaallit Nunaanni aningaaserivinni ileqqaakkanit pissarsiat kiisalu, soraarnerussutisiaqalernissamut aaqqissuussinerit Danmarkimi pilersinneqarsimasut.

Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu siunnersuummi siunniunneqarput Kalaallit Nunaanni soraarnerussutisiaqalernissamut aningaasaateqarfinni ileqqaakkanit pissarsiat.

Inatsisissatut siunnersuutini taakkunani marlunni akileraarutip 15,3 procentiunissaa siunnersuutigineqarpoq. Soraarnerussutisiaqalernissamut aaqqissuussinerit allat taama akileraaruserneqartareernerannut akigititassatut siunnersuutigineqartoq attuumassuteqarpoq.

Soraarnerussutisiaqalernissamut aaqqissuussinernut nunami allamiittunut akiliinerit ullumikkut pifissami akiliiffimmi akileraaruserneqartarput. Paarlattuanik aaqqissuussinerit taaku tunniunneqaraangata akileraarusigaaneq ajorput. Akileraarusiisussaannginnejaaq aqqiissutinit pissarsianut aamma atuuppoq. Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu siunnersuutip quakkissavaa, aaqqissuussinernit taakkunangna pissarsiat ilaannit akileraarusiisoqartarnissaa.

Soraarnerussutisiaqalernissamut aaqqissuussinernut Kalaallit Nunaanniittunut akiliinerit ilanngaaserneqartarput imaluunniit ilanngaaserneqartussaatitaasrput. Taamaasillutik maannakkut

akileraartartut siunissami akileraartartuusussanut akileraarusiinissamut piginnaatitaatisipput. Tamanna tunngavigalugu agguaanissaq eqqarsaatigalugu naleqquttuussaaq, soraarnerussutisiaqalernissamut aaqqissuussinerni taakkunani ingerlaavartumik pissarsiaasartut ullumikkut annikinnerusumik akilerausersorneqarpata. Taamaasilluni soraarnerussutisiaqalernissamut aaqqissuussinernit taakkunanga pissarsianik akileraarusiisarnissaq appasissoq siunnersuutigineqartoq, siunissami kinguaariissat akileraartarnikkut tunngavissaqarnissaannut sunneeqataassaaq.

Marloriaammik akileraarusiisarneq pillugu Kalaallit Nunaata Danmarkillu akornanni isumaqtigiisummik 2012-imeersumik Kalaallit Nunaat pisussaaffilerpoq soraarnerussutisiaqalernissamut pissarsianit akileraarutinik (PAL-imut akileraarutinik taaneqartartumik) maani nunami akileeqquisassalluni, innuttaasunillu Danmarkimi akileraartussaatitaasunit iluanaarutaasunit, Danmarkimi SKAT-imut nuussisassalluni. Tassunga assingusumik Danmark Kalaallit Nunaannut pisussaaffeqarpoq. 2014-imi Kalaallit Nunaanni akileraartussaatitaasut soraarnerussutisiaqalernissamut aningasaateqarfinni Danmarkimiittuni ileqqaagaanit PAL-imut akileraarutinik 22 mio. kr.-inik Kalaallit Nunaat tigusaqarpoq. Naatsorsuutigineqarpoq, isumaqtigiissut eqquutsinniarlugu, ukiumut millionit koruunit affaasa missaannik Kalaallit Nunaannit Danmarkimut nuussisoqartassasoq.

Siunnersuutini saqqummiunneqartuni anguniarneqarpoq soraarnerussutisiaqarnissamut aaqqissuussalinnut, nunami maani najugaqartunut, soraarnerussutisiaqalernissamut aaqqissuussinerit tamangajammik, Kalaallit Nunaanniinneri Danmarkimiinneriluunniit apeqquaatinngagit naligiisumik akilerausersorneqartalernissaat. Tamanna naleqquttutut isigineqarpoq, sulisartorpassuummi isumaqtigiisutitik naapertorlugit soraarnerussutisiaqalernissamut, suliffeqarfimmik maani nunamiittumik imaluunniit Danmarkimiittumik atuinissamut pituttorneqartarmata, taamaattumillu soraarnerussutisiaqalernissamut ileqqaakkatik sumiitikkumanerlugin, nalinginnaasumik nammineq aalajangiineq ajorlugit. Siunnersuummillu matuminnga taamaasilluni maani nunami soraarnerussutisiaqalernissamut ileqqaartunik tamanik naligiinnerusumik sullissisoqalissaq.

Akileraarusiinerit allat tamaasa assigalugit soraarnerussutisiaqalernissamut aaqqissuussinernit pissarsianik akileraarusiinerup, akileraareerluni aningaasanik innuttaasup atorsinnaasaanik annikillisitsissaq. Ullumikkut naatsorsuutiginartumillu siunissami soraarnerussutisiaillit aningasaqarnerat nammineq soraarnerussutisiaqalernissamut aaqqissuussinernit, utoqqalinermi soraarnerussutisianit, tapiissutinik soorlu ineqarnermut tapiissutinik il.il. qulakkeerneqartarpoq. Isertitakinnerusunut soraarnerussutisiaqalernissamut aaqqissuussinernit pissarsiaannik annikinnerusumik akilerausersuineq aningaasaqarnikkut annikitsuinnarmik sunniuteqassasoq naatsorsuutigineqarpoq, aningaasaqarnerammi annerpaatigut isumaginninnermi ikorsiissutinit qulakkeerneqarmat. Taamaasilluni isertitakittut akileraartitsinnginnermut taarsiullugu isumaginninnikkut qulakkeerininniarnermut pitsasunik aaqqiissutitigut isumaginiarneqarput, aamma pigissaarnerusunut iluaqutaasumik.

Akileraartartut ataasiakkaat aningaasaliisinnanermut ileqqaarsinnaanermullu aalajangiinissaannut annikinnerpaamik sunniisussamik akileraartitseriaaseqarnissaq tulluunnerpaagaluarpoq. Matumuuna anguneqarpoq, akileraartartut aalajangerneri niuernikkut isumaliutersuutiviit tunngavigalugit aalajangerneqartartut, tamannalu nalinginnaasumik inuiaqatigut aningaasaqarnerannut tulluartutut isigineqarsinnaavoq. Tamannalu tunngavigalugu, inatsisisstatut siunnersuutit uku marluk saniatigut ataatsimiinnermi matumani pappiaqqanit nalilinnit iluanaarutit akilerausersorneqarnerat pillugu inatsisisstatut siunnersuummik Naalakkersuisut saqqummiussinissartik naatsorsuutigaat.

Inatsisisstatut siunnersuutit taakku pingasut tamarmik ataatsimik siunertaqarput, tassa aningaasaatinik akilerausersuisarnermi maanna atuuttumi unammillernartut ilaasa iliuuseqarfiginissaat, tamatumani aningaasaatininit isertitat ilaat 44 procentit tungaannut akileraarummik akileraaruserneqartarput, isertitalli ilaat akileraarusigaasarnatik. Akileraaruseeriaaseq atuuttoq taamaasilluni allat

akiligaannik ileqqaariaatsit ilaannut pitsaanerusumik iluaqtsiivoq, tamanna pingarnertut aningaasaqarnikkut pitsaanerusumik inissimasunut iluaqtaalluni. Tamanna tunngavigalugu inuiaqatigiinni aningaasaqarnikkut naligiinnerunissamut Naalakkersuisut siunertaannut siunnersuutit tapertaapput.

Siunnersuutit qulaani taaneqartut ilaatigut Naalakkersuisut 2016-imi Attassisinnaanermut siuariartornermullu pilersaarutaanni saqqummiunneqarnikuupput, tassani siunnersuutit aaqqissusseqqinnermi sammivik 4-p ataani suliniut 18-itut saqqummiunneqarlutik.

Inatsisissatut siunnersuutit taakku pingasut immikkut ataatsimullu siunissami akileraartitseriaatsimik oqimaaqatigiissitsinissamik pilersitsissapput.

Naggataatigut inatsisissatut siunnersuutinut taakkununngalu oqaaseqaatinut innersuussissaanga.

Taama oqaaseqarlunga Naalakkersuisut sinnerlugit inatsisissatut siunnersuutit marluk Inatsisartunut suliassanngortippakka.